



ЎЗБЕКИСТОН RESPUBLIKASI VAZIRLAR MAHKAMASINING QARORI

20 22 yil « 9 » iyun

№ 322

Toshkent sh.

Мутахассислиги бўйича камида беш йил меҳнат стажига эга бўлган хотин-қизларни давлат олий таълим муассасаларига ўқишга қабул қилиш тартибини тасдиқлаш ҳақида

Ўзбекистон Республикаси Президентининг “Оила ва хотин-қизларни тизимли қўллаб-қувватлашга доир ишларни янада жадаллаштириш чора-тадбирлари тўғрисида” 2022 йил 7 мартдаги ПФ–87-сон Фармони ижросини таъминлаш ҳамда давлат органлари ва ташкилотларда олий маълумотли хотин-қизлар улушини янада ошириш мақсадида Вазирлар Маҳкамаси қарор қилади:

1. Куйидагиларни назарда тутувчи **Мутахассислиги бўйича камида беш йил меҳнат стажига эга бўлган хотин-қизларни давлат олий таълим муассасаларига ўқишга қабул қилиш тартиби тўғрисидаги низом 1-иловага мувофиқ тасдиқлансин:**

давлат органлари ва ташкилотларда мутахассислиги бўйича камида беш йил меҳнат стажи мавжуд, бироқ олий маълумотга эга бўлмаган хотин-қизларни (кейинги ўринларда – хотин-қизлар) давлат олий таълим муассасаларининг бакалавриатига базавий тўлов-контракт асосида ўқишга қабул қилиш бўйича алоҳида қабул параметрларини белгилаш тартиби;

хотин-қизларга Оила ва хотин-қизлар давлат қўмитаси томонидан бир марта 3 йил муддат давомида амал қиладиган тавсиянома бериш;

тавсияномага эга бўлган хотин-қизларни олий таълим муассасаларига кириш учун танловлар натижасига кўра алоҳида қабул параметрлари доирасида ўқишга қабул қилиш тартиби.

2. Белгилансинки:

тавсияномага эга бўлган хотин-қизлар учун танловлар умумий тартибда давлат олий таълим муассасаларининг бакалавриатига ўқишга қабул қилиш бўйича **кириш имтиҳонлари (тест синови, касбий (ижодий) имтиҳон) доирасида ўтказилади;**

кириш имтиҳонлари яқунларига кўра тўпланган балл бўйича талабалikka тавсия этилмаган, бироқ тўплаш мумкин бўлган энг юқори баллнинг 30 фоизини ва ундан кам бўлмаган баллни тўплаган тавсияномага эга бўлган хотин-қизлар Ўзбекистон Республикаси таълим муассасаларига ўқишга қабул қилиш бўйича давлат комиссияси томонидан тақсимланган квоталар асосида, баллар кетма-кетлигига қатъий риоя этилган ҳолда, алоҳида қабул параметрлари (жами 500 та квота) доирасида танловга кўра тўлов-контракт асосида ўқишга тавсия этилади.

3. Оила ва хотин-қизлар давлат қўмитаси Олий ва ўрта махсус таълим вазирлиги, тизимида профессионал таълим муассасалари бўлган вазирликлар ва идоралар билан биргаликда **икки ой муддатда** коллеж ва техникумларни битирган ҳамда олий маълумотга эга бўлмаган хотин-қизлар рўйхатини мутахассислиги бўйича шакллантирсин ва доимий янгилаб борсин.

Бандлик ва меҳнат муносабатлари вазирлиги мазкур рўйхатдаги хотин-қизларнинг камида беш йил меҳнат стажига эгалигини “Ягона миллий меҳнат тизими” идоралараро дастурий-аппарат комплекси маълумотлари асосида аниқласин ва доимий янгилаб борилишини таъминласин.

4. Оила ва хотин-қизлар давлат қўмитаси Олий ва ўрта махсус таълим вазирлиги билан келишган ҳолда **ҳар йили 1 июнга қадар** хотин-қизлар меҳнат фаолияти кам бўлган соҳаларда камида беш йил меҳнат стажига эга бўлган хотин-қизлар учун ажратилган тўлов-контракт асосидаги **500** та алоҳида квотани давлат олий таълим муассасалари бўйича тақсимлаш ва тасдиқлаш учун Ўзбекистон Республикаси таълим муассасаларига ўқишга қабул қилиш бўйича давлат комиссиясига киритсин.

5. 2022-2023 ўқув йили учун талабгорлардан ҳужжатларни қабул қилиш муддатлари истисно тариқасида Оила ва хотин-қизлар давлат қўмитасининг таклифлари асосида Ўзбекистон Республикаси таълим муассасаларига ўқишга қабул қилиш бўйича давлат комиссияси томонидан белгилансин, келгуси ўқув йилларидан бошлаб талабгорлардан ҳужжатларни қабул қилиш 1-иловага мувофиқ умумий тарзда амалга оширилсин.

6. Вазирлар Маҳкамасининг “Ота-онаси ёки уларнинг биридан айрилган муҳтож қизлар ва боқувчиси йўқ ёлғиз аёллар олий таълим олишини моддий жиҳатдан қўллаб-қувватлаш чора-тадбирлари тўғрисида” 2021 йил 17 сентябрдаги 585-сон қарорига 2-иловага мувофиқ ўзгартириш ва қўшимчалар киритилсин.

7. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари – Оила ва хотин-қизлар давлат қўмитаси раиси З.Б. Маҳкамова ҳамда Ўзбекистон Республикаси олий ва ўрта махсус таълим вазири А.Х. Тошқулов зиммасига юклансин.

Ўзбекистон Республикасининг
Бош вазири



А. Арипов

Вазирлар Маҳкамасининг
2022 йил 9 июндаги 322 -сон қарорига
1-илова

**Мутахассислиги бўйича камида беш йил меҳнат стажига эга бўлган
хотин-қизларни давлат олий таълим муассасаларига ўқишга
қабул қилиш тартиби тўғрисида
НИЗОМ**

1-боб. Умумий қоидалар

1. Мазкур Низом мутахассислиги бўйича камида беш йил меҳнат стажига эга бўлмаган хотин-қизларни давлат олий таълим муассасаларига алоҳида қабул параметрлари доирасида танлов натижаларига кўра тўлов-контракт асосида ўқишга қабул қилиш тартибини белгилайди.

Бунда ўқишга қабул қилиш Ўзбекистон Республикаси Оила ва хотин-қизлар давлат қўмитасининг (кейинги ўринларда – Қўмита) тавсияномаси асосида мутахассислиги бўйича камида беш йил меҳнат стажига эга бўлмаган хотин-қизлар ҳисобидан, иш фаолиятига мос бўлган давлат олий таълим муассасаларининг бакалавриятига ўқишга қабул қилиш бўйича кириш имтиҳонлари (тест синови, касбий (ижодий) имтиҳон) доирасида амалга оширилади.

Ушбу Низом олий ҳарбий ва ҳарбийлаштирилган таълим муассасаларига, Ўзбекистон Республикасида фаолият олиб бораётган хорижий ва нодавлат олий таълим ташкилотлари ҳамда уларнинг филиалларига нисбатан татбиқ этилмайди.

2. Мазкур Низомда қуйидаги асосий тушунчалар қўлланилади:

ишчи гуруҳ – талабгорга тавсиянома бериш масаласини кўриб чиқиш учун ташкил этилган туман (шаҳар) ҳокими ўринбосари – оила ва хотин-қизлар бўлими бошлиғи (ишчи гуруҳ раҳбари), туман (шаҳар) иқтисодий тараққиёт ва камбағалликни қисқартириш бўлими бошлиғи, туман (шаҳар) молия бўлими бошлиғи, туман (шаҳар) солиқ бўлими бошлиғи, туман (шаҳар) аҳоли бандлигига кўмаклашиш маркази бошлиғи, туман (шаҳар) халқ таълими бўлими бошлиғи, туман (шаҳар) мактабгача таълим бўлими бошлиғи, Ёшлар ишлари агентлиги туман (шаҳар) бўлими раҳбаридан иборат таркибда Оила ва хотин-қизлар бўлимида тузиладиган гуруҳ.

Ишчи гуруҳ фаолияти унинг аъзоларининг учдан икки қисми иштирок этган тақдирда, ваколатли ҳисобланади;

мутахассислик – талабгорнинг ўрта махсус ва профессионал таълим бўйича олган мутахассислиги;

талабгор – тавсиянома асосида мутахассислиги бўйича камида беш йил меҳнат стажи мавжуд, бироқ олий маълумотга эга бўлмаган ҳамда давлат олий таълим муассасаларига кириш истагида бўлган хотин-қизлар.

3. Тавсиянома олиш учун талабгор қуйидаги мезонларнинг барчасига мувофиқ келиши керак:

ўрта махсус ёки профессионал таълим бўйича мутахассисликка эга бўлиши;

тавсиянома олгунга қадар олий таълим олмаганлиги ёки олмаётганлиги;

ўрта махсус ёки профессионал таълим мутахассислиги бўйича беш йиллик меҳнат стажига эга бўлиши.

Тавсиянома берилган кундан бошлаб уч йил муддат давомида фақат бир марта олий таълим муассасасига қабул қилиниши учун амал қилади.

4. Тавсияномага эга бўлган талабгорларни давлат олий таълим муассасаларига танлов натижалари доирасида тўлов-контракт асосида ўқишга қабул қилиш мазкур Низомга 1-иловада келтирилган схемага мувофиқ амалга оширилади.

2-боб. Тавсияномани бериш тартиби

5. Туман (шаҳар) оила ва хотин-қизлар бўлимлари талабгорга тавсиянома бериш масаласини кўриб чиқиш учун **ҳар йили 25 апрелга қадар** ишчи гуруҳларни ташкил этади.

6. Тавсиянома олиш учун талабгор доимий яшаш ёки вақтинча рўйхатда турган жойидаги туман (шаҳар) оила ва хотин-қизлар бўлимлари (ишчи гуруҳ)га **ҳар йили 1 майдан 1 июнга қадар** ушбу Низомга 2-иловада келтирилган шаклга мувофиқ ариза билан мурожаат қилади.

Ушбу бандда кўрсатилган муддатдан кечикиб берилган аризалар кўриб чиқилмайди.

7. Ишчи гуруҳлар тавсиянома олиш мақсадида мурожаат этган талабгорларнинг ариза ва унга илова қилинган ҳужжатларини мазкур Низомнинг 3-бандида белгиланган мезонларга мувофиқлиги юзасидан **ҳар йили 1 июндан 7 июнга қадар** кўриб чиқади.

Бунда ишчи гуруҳлар томонидан мазкур Низомнинг 3-бандида кўрсатилган мезонларни тасдиқловчи маълумотлар ва электрон шаклдаги ҳужжатлар (меҳнат стажини тасдиқловчи маълумотлар, ўрта махсус таълим муассасасида ўқиганликни тасдиқловчи архив маълумотномаси) “Электрон ҳукумат” тизими идоралараро интеграциялашув платформаси ҳамда “Ягона миллий меҳнат тизими” идоралараро дастурий-аппарат комплекси орқали олинади.

“Ягона миллий меҳнат тизими” идоралараро дастурий-аппарат комплекси жорий қилингунга қадар ишлаган ва 2020 йил 1 январдан кейинги даврда меҳнат фаолиятини олиб бормаётган талабгорларнинг иш стажи маълумотлари

(агар “Ягона миллий меҳнат тизими” идоралараро дастурий-аппарат комплексида қайд этилмаган бўлса) уларнинг меҳнат дафтарчаларидаги ёзувлар асосида олинади.

Талабгорларнинг ўзлари томонидан “Ягона миллий меҳнат тизими” идоралараро дастурий-аппарат комплексига киритилган ва бугунги кунда тизимда тасдиқланмаган иш стажи маълумотлари меҳнат дафтарчаларидаги ёзувлар билан бир хил бўлган тақдирда инобатга олинади.

8. Ишчи гуруҳлар тавсиянома беришга тавсия этилган талабгорларнинг рўйхатларини шаклантиради. Бунда талабгорларнинг ҳужжатларини кўриб чиқиш якуни бўйича қуйидаги хулосалардан бири қабул қилинади:

тавсиянома беришга тавсия этиш тўғрисида;

тавсиянома беришга тавсия этишни рад этиш тўғрисида.

9. Қуйидагилар тавсиянома беришга тавсия этишни рад этиш учун асос ҳисобланади:

талабгорнинг ушбу Низомнинг 3-бандида белгиланган мезонларга мувофиқ эмаслиги;

ариза ваколатга эга бўлмаган шахс томонидан берилганлиги.

10. Ишчи гуруҳ йиғилишининг якуни бўйича электрон ҳужжат шаклидаги баённома тузилиб, ишчи гуруҳ раҳбари ва аъзоларининг электрон рақамли имзолари билан тасдиқланади.

Ишчи гуруҳнинг хулосаси асосида туман (шаҳар) оила ва хотин-қизлар бўлими раҳбарининг талабгорга тавсияномани бериш ёки тавсиянома беришни рад этиш тўғрисидаги қарори (электрон ҳужжат шаклида) қабул қилинади ва тегишли ҳужжатлар илова қилинган ҳолда кўриб чиқиш учун **10 июнга қадар** Қўмитага тақдим қилинади.

11. Қўмита туман (шаҳар) оила ва хотин-қизлар бўлими раҳбарининг қарори ва унга илова қилинган ҳужжатларни **ҳар йили 10 июндан 14 июнга қадар** мазкур Низом талабларига мувофиқлиги юзасидан кўриб чиқади ҳамда тавсияномани бериш ёки тавсиянома беришни рад этиш тўғрисида Қўмита биринчи раҳбарининг буйруғи чиқарилади.

Тавсиянома ушбу Низомга 3-иловада келтирилган шаклга мувофиқ Қўмитанинг биринчи раҳбари томонидан, биринчи раҳбар лавозими вакант бўлганда ва/ёки унинг вазифаларини бажариш бошқа шахсга юклатилганда эса – ушбу раҳбар томонидан берилади.

Қўмита биринчи раҳбарининг буйруғи **ҳар йили 14 июнга қадар** тегишли туман (шаҳар) оила ва хотин-қизлар бўлимига (ишчи гуруҳга) талабгорни хабардор қилиш учун юборилади.

Ишчи гуруҳ томонидан **икки иш куни ичида** талабгорларнинг мобил телефон рақамига ёки электрон манзилига тавсиянома беришга тавсия этилганлиги ёки рад этилганлиги тўғрисида хабар юборилади.

Талабгор қарордан норози бўлган тақдирда, қонунчилик ҳужжатларида белгиланган тартибда судга шикоят қилиш ҳуқуқига эга.

12. Қўмита ҳар йили 15 июнга қадар:

тавсиянома берилган хотин-қизлар электрон реестрини шакллантиради;
тавсияномага эга бўлган хотин-қизлар рўйхатларини ва улар ҳақидаги маълумотларни махсус дастурга киритиш учун Давлат тест марказига юборади;
тавсиянома берилган талабгорларнинг рўйхатини ўз расмий веб-сайтида эълон қилади.

13. Ишчи гуруҳ ҳар йили 15 июнга қадар тавсиянома талабгорларга етказилишини таъминлайди.

14. Қорақалпоғистон Республикаси Оила ва хотин-қизлар давлат қўмитаси, вилоятлар ва Тошкент шаҳар оила ва хотин-қизлар бошқармалари ишчи гуруҳлар фаолиятини ташкил қилади, мувофиқлаштиради ҳамда амалий ва методик жиҳатдан кўмаклашади.

3-боб. Ўқишга қабул қилиш бўйича алоҳида қабул параметрларини белгилаш

15. Қўмита Олий ва ўрта махсус таълим вазирлиги билан келишган ҳолда ҳар йили 10 июнга қадар хотин-қизлар меҳнат фаолияти кам бўлган соҳаларда камида беш йил меҳнат стажига эга бўлган хотин-қизлар учун ажратилган тўлов-контракт асосидаги **500** та алоҳида квотани давлат олий таълим муассасалари бўйича тақсимлайди ва тасдиқлаш учун Ўзбекистон Республикаси таълим муассасаларига ўқишга қабул қилиш бўйича давлат комиссияси (кейинги ўринларда – Давлат комиссияси)га киритади.

16. Давлат олий таълим муассасалари бўйича тақсимланган алоҳида квота ҳар йили 15 июнга қадар Давлат комиссияси қарори билан тасдиқланади.

4-боб. Талабгорларни рўйхатдан ўтказиш

17. Тавсияномага эга бўлганлар давлат олий таълим муассасаларининг бакалаврият таълим йўналишига ўқишга қабул қилиш учун қонунчилик ҳужжатларида белгиланган муддатларда Ягона интерактив давлат хизматлари портали ёки Вазирлар Маҳкамаси ҳузуридаги Давлат тест марказининг расмий веб-сайти орқали рўйхатдан ўтади.

18. Тавсияномага эга бўлган хотин-қизларнинг имтиёзлари ҳақидаги маълумотлар Вазирлар Маҳкамаси ҳузуридаги Давлат тест марказининг (кейинги ўринларда – Давлат тест маркази) махсус дастури орқали рўйхатдан ўтиш жараёнида талабгорларнинг шахсий кабинетини (имтиёзлар бўлими)да шаклланади.

19. Давлат тест маркази 10 кун муддатда талабгорларнинг шахсий кабинетини (имтиёзлар бўлими)да тавсияномага эга бўлган хотин-қизларнинг имтиёзлари ҳақидаги маълумотлар қайд этилиши юзасидан расмий дастурга ўзгартиришлар киритади.

Талабгорларнинг шахсий кабинетидида унга тегишли тавсиянома ҳақида маълумот мавжуд бўлмаса, Қўмигага муурожаат қилади.

5-боб. Талабгорларнинг тест синовида иштирок этиши ва натижаларни эълон қилиш

20. Тавсияномага эга бўлган хотин-қизлар учун танловлар умумий тартибда давлат олий таълим муассасаларининг бакалавриатига ўқишга қабул қилиш бўйича кириш имтиҳонлари (тест синови, касбий (ижодий) имтиҳон) доирасида ўтказилади.

21. Кириш имтиҳонлари якунларига кўра тўпланган балл бўйича талабаликка тавсия этилмаган, бироқ тўплаш мумкин бўлган энг юқори баллнинг 30 фоизини ва ундан кам бўлмаган баллни тўплаган тавсияномага эга бўлган хотин-қизлар баллар кетма-кетлигига қатъий риоя этилган ҳолда, Давлат комиссияси томонидан тақсимланган алоҳида қабул параметрлари доирасида тўлов-контракт асосида ўқишга тавсия этилади.

22. Кириш имтиҳонларида тўплаш мумкин бўлган энг юқори баллнинг 30 фоизини ва ундан кам бўлмаган баллни тўплаган, аммо талабаликка тавсия этилмаган тавсияномага эга бўлган хотин-қизлар юзасидан маълумотлар Давлат тест маркази томонидан баллар кетма-кетлиги бўйича, абитуриент сифатида рўйхатдан ўтиш даврида танлаган биринчи таълим йўналишларига ўқишга қабул қилиш бўйича кириш имтиҳонларининг якуний натижаси эълон қилинган кундан бошлаб беш кун муддатда Қўмигага тақдим этилади.

23. Тавсияномага эга бўлган хотин-қизлар учун ажратилган алоҳида қабул параметрлари доирасида, баллар кетма-кетлиги бўйича абитуриент рўйхатдан ўтиш даврида танлаган биринчи таълим йўналишига танлов натижаси асосида талабаликка тавсия этилади.

6-боб. Якунловчи қоидалар

24. Мазкур Низомни қўллашда юзага келадиган низолар қонунчилик ҳужжатларида белгиланган тартибда ҳал этилади.

25. Ушбу Низом талаблари бузилишида айбдор бўлган шахслар қонунчиликка мувофиқ жавоб берадилар.

Мутахассислиги бўйича камида беш йил меҳнат
стажига эга бўлган хотин-қизларни давлат олий
таълим муассасаларига ўқишга қабул қилиш
тартиби тўғрисидаги низомга
1-илова

**Тавсияномага эга бўлган талабгорни давлат олий таълим муассасаларига
танлов натижалари доирасида тўлов-контракт асосида ўқишга қабул қилиш
СХЕМАСИ**

Босқичлар	Субъектлар	Чора-тадбирлар	Муддатлар
1-босқич	Талабгор	Олий таълим муассасасига ўқишга кириш мақсадида тавсиянома олиш учун мурожаат қилади.	Ҳар йили 1 майдан 1 июнга қадар
2-босқич	Туман (шаҳар) оила ва хотин-қизлар бўлими Ишчи гуруҳлар	1. Туман (шаҳар) оила ва хотин-қизлар бўлимларида тегишли ташкилотлар вакилларида иборат ишчи гуруҳ шакллантирилади. 2. Хотин-қизларнинг мурожаатлари асосида уларга тавсиянома беришга тавсия этиш ёки уни рад этиш тўғрисида хулоса қабул қилади ва уни туман (шаҳар) оила ва хотин-қизлар кўмитасига тақдим қилади.	Ҳар йили 25 апрелга қадар Ҳар йили 1 июндан 7 июнга қадар
3-босқич	Туман (шаҳар) оила ва хотин-қизлар бўлими	Ишчи гуруҳ хулосаси асосида хотин-қизларга тавсиянома беришга тавсия этиш ёки уни рад этиш тўғрисида қарор қабул қилади ҳамда уни Оила ва хотин-қизлар давлат кўмитасига кўриб чиқиш учун тақдим этади.	Ҳар йили 7 июндан 10 июнга қадар
4-босқич	Оила ва хотин-қизлар давлат кўмитаси	1. Тақдим этилган қарор ва унга илова қилинган ҳужжатларни кўриб чиқиб, Оила ва хотин-қизлар давлат кўмитаси биринчи раҳбарининг тавсияномаларни бериш ёки уни рад этиш тўғрисидаги буйруғини чиқаради. 2. Тасдиқланган тавсияномаларни барча туман (шаҳар) оила ва хотин-қизлар бўлимларига юборади.	Ҳар йили 10 июндан 14 июнга қадар Ҳар йили 15 июнга қадар
5-босқич	Оила ва хотин-қизлар давлат кўмитаси	1. Тавсиянома берилган хотин-қизлар электрон реестрини шакллантиради. 2. Тавсияномага эга бўлган хотин-қизлар рўйхатларини ва улар ҳақидаги маълумотларни махсус дастурга киритиш учун Давлат тест марказига юборади. 3. Тавсиянома берилган талабгорларнинг рўйхатини Кўмитанинг расмий веб-сайтида эълон қилади.	Ҳар йили 15 июнга қадар
6-босқич	Туман (шаҳар) оила ва хотин-қизлар бўлими	Тавсияномалар талабгорларга етказилишини таъминлайди.	Ҳар йили 15 июнга қадар

Мутахассислиги бўйича камида беш йил меҳнат
стажига эга бўлган хотин-қизларни давлат олий
таълим муассасаларига ўқишга қабул қилиш
тартиби тўғрисидаги низомга
2-илова

НАМУНА

_____ туман (шаҳар) оила ва хотин-қизлар
бўлими бошлиғи
_____ га

_____ тумани (шаҳри) “_____” МФЙ
_____ кўчаси _____-уй _____-хонадонда
яшовчи фуқаро
_____ дан

АРИЗА

Мен _____ мутахассислиги бўйича фаолият кўрсатаётганимга
(мутахассислик номи)

_____ йил бўлганлиги муносабати билан хотин-қизлар учун давлат олий таълим муассасаларининг бакалавриятига базавий тўлов-контракт асосида ажратилган алоҳида қабул параметрлари доирасида _____ таълим йўналиши бўйича ўқишга кириш учун тавсиянома олишимга рухсат беришингизни сўрайман.

Аризага қуйидаги ҳужжатларни илова қиламан:

1. Фуқаролик паспорти ёки ID карта нусхаси.
2. Меҳнат дафтарчасидан кўчирма
3. Маълумотнома-объективка.

(Ф.И.О)

(сана)

(имзо)

Мутахассислиги бўйича камида беш йил меҳнат
стажига эга бўлган хотин-қизларни давлат олий
таълим муассасаларига ўқишга қабул қилиш
тартиби тўғрисидаги низомга
3-илова

**Олий таълим муассасаларига камида беш йил меҳнат стажига эга бўлган
хотин-қизларни давлат олий таълим муассасаларининг бакалаврият
таълим йўналишларига алоҳида қабул параметрлари асосида
танловда иштирок этиши учун
ТАВСИЯНОМА**

**ТАВСИЯНОМА
№ АА 000000**

Ушбу тавсиянома фуқаро

_____ га

(фамилияси, исми, отасининг исми)

_____ (ЖШШИР) Ўзбекистон Республикаси Вазирлар Маҳкамасининг
20__ йил “__” _____ даги “_____”-сон қарорига мувофиқ мутахассислиги бўйича
камида беш йил иш стажига эга бўлган хотин-қизларни давлат олий таълим муассасаларининг
бакалаврият _____ таълим йўналишларига умумий қабул параметрларидан
ташқари танловда иштирок этиш учун берилди.

Тавсиянома Ўзбекистон Республикаси Оила ва хотин-қизлар давлат қўмитаси биринчи
раҳбарининг 20__ йил “__” _____ даги “_____”-сон буйруғига асосан берилди.

Тавсиянома _____ расмийлаштириб _____ берилган _____ кундан _____ эътиборан
уч йил муддат давомида фақат бир марта олий таълим муассасасига қабул қилиниш учун амал
қилади.

Оила ва хотин-қизлар давлат қўмитаси биринчи раҳбари

_____ (Ф.И.О.)

_____ (имзо)

QR – код (матрик штрихли код)

20__ йил “__” _____

Вазирлар Маҳкамасининг
2022 йил 9 июндаги 322-сон қарорига
2-илова

Вазирлар Маҳкамасининг “Ота-онаси ёки уларнинг биридан айрилган муҳтож қизлар ва боқувчиси йўқ ёлғиз аёллар олий таълим олишини моддий жиҳатдан қўллаб-қувватлаш чора-тадбирлари тўғрисида” 2021 йил 17 сентябрдаги 585-сон қарорига киритилаётган ўзгартириш ва қўшимчалар

1. Номи қуйидаги таҳрирда баён қилинсин:

“Ижтимоий эҳтиёжманд оила вакиллари, етим ёки ота-онасининг қарамоғидан маҳрум бўлган талаба хотин-қизларнинг олий таълим олишини моддий жиҳатдан қўллаб-қувватлаш чора-тадбирлари тўғрисида”.

2. Муқаддима қуйидаги таҳрирда баён қилинсин:

“Ўзбекистон Республикаси Президентининг “Оила ва хотин-қизларни тизимли қўллаб-қувватлашга доир ишларни янада жадаллаштириш чора-тадбирлари тўғрисида” 2022 йил 7 мартдаги ПФ–87-сон Фармони ҳамда “Хотин-қизларни қўллаб-қувватлаш, уларнинг жамият ҳаётидаги фаол иштирокини таъминлаш тизимини янада такомиллаштириш чора-тадбирлари тўғрисида” 2021 йил 5 мартдаги ПҚ–5020-сон қарори ижросини таъминлаш, шунингдек, эҳтиёжманд хотин-қизларнинг таълим олишга бўлган қизиқишларини рағбатлантириш ва моддий жиҳатдан қўллаб-қувватлаш, билим олишлари учун имкониятлар яратиш мақсадида Вазирлар Маҳкамаси қарор қилади:”.

3. 1 ва 2-бандлар қуйидаги таҳрирда баён қилинсин:

“1. Ўзбекистон Республикаси Президентининг “Хотин-қизларни қўллаб-қувватлаш, уларнинг жамият ҳаётидаги фаол иштирокини таъминлаш тизимини янада такомиллаштириш чора-тадбирлари тўғрисида” 2021 йил 5 мартдаги ПҚ–5020-сон қарори ҳамда “Оила ва хотин-қизларни тизимли қўллаб-қувватлашга доир ишларни янада жадаллаштириш чора-тадбирлари тўғрисида” 2022 йил 7 мартдаги ПФ–87-сон Фармонига мувофиқ:

а) ҳар йили базавий тўлов-контракт асосида давлат олий таълим муассасасига қабул қилинган, ижтимоий эҳтиёжманд оила вакиллари, етим ёки ота-онасининг қарамоғидан маҳрум бўлган талаба хотин-қизларни (кейинги ўринларда – эҳтиёжманд талабалар) Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари ҳисобидан ўқитиш тартиби жорий этилганлиги;

б) бунда, ўқиш учун тўлов пуллари Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари томонидан ҳар йили 150 нафардан эҳтиёжманд талабалар учун маҳаллий бюджетнинг қўшимча манбалари ҳисобидан қайтариш шартсиз қоплаб берилиши белгиланганлиги маълумот учун қабул қилинсин.

2. Қуйидагиларни назарда тутувчи Ижтимоий эҳтиёжманд оила вакиллари, етим ёки ота-онасининг қарамоғидан маҳрум бўлган талаба хотин-қизларнинг олий таълим олишини моддий жиҳатдан қўллаб-қувватлаш тартиби тўғрисидаги низом иловага мувофиқ тасдиқлансин:

Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари томонидан базавий тўлов-контракт миқдорини тўлаб бериш мақсадида талабгорларни танлаб олиш мезонлари;

талабгорларни танлаб олиш шартлари ва шу мақсадда маҳаллий ҳокимликлар ҳузурида ташкил этилаётган комиссиялар фаолияти;

маҳаллий ҳокимликлар томонидан олий таълим муассасаларига танланган 150 нафар талабгорларга тўлов-контракт миқдорини тўлаб бериш тартиби”.

4. 3-банддаги “Маҳалла ва оилани қўллаб-қувватлаш вазирлиги” сўзлари “Оила ва хотин-қизлар давлат қўмитаси” сўзлари билан алмаштирилсин.

5. 5-банд қуйидаги таҳрирда баён қилинсин:

“5. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари – Оила ва хотин-қизлар давлат қўмитаси раиси З.Б. Махкамова ҳамда Ўзбекистон Республикаси олий ва ўрта махсус таълим вазири А.Х. Тошқулов зиммасига юклансин”.

6. Илова (Ота-онаси ёки уларнинг биридан айрилган муҳтож қизлар, боқувчиси йўқ ёлғиз аёллар олий таълим олишини моддий жиҳатдан қўллаб-қувватлаш тартиби тўғрисидаги низом) да:

а) номи қуйидаги таҳрирда баён қилинсин:

“Ижтимоий эҳтиёжманд оила вакиллари, етим ёки ота-онасининг қарамоғидан маҳрум бўлган талаба хотин-қизларнинг олий таълим олишини моддий жиҳатдан қўллаб-қувватлаш тартиби тўғрисида НИЗОМ”;

б) 1 ва 2-бандлар қуйидаги таҳрирда баён қилинсин:

“1. Ушбу Низом ижтимоий эҳтиёжманд оила вакиллари, етим ёки ота-онасининг қарамоғидан маҳрум бўлган талаба хотин-қизлар (кейинги ўринларда – талабгорлар) олий таълим олишини моддий жиҳатдан қўллаб-қувватлаш мақсадида базавий тўлов-контракт миқдори тегишлича Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари (кейинги ўринларда – ҳокимликлар) томонидан тўлаб берилиши тартибини белгилайди.

2. Мазкур Низом 2022/2023 ўқув йилидан бошлаб олий таълим муассасаларига ўқишга қабул қилиш бўйича Ўзбекистон Республикаси Президентининг ёки Вазирлар Маҳкамасининг тегишли қарори билан тасдиқланган қабул параметрлари доирасида базавий тўлов-контракт асосида давлат олий таълим муассасасининг бакалаврият таълим йўналишига (таълим шаклидан қатъи назар) талабаликка тавсия этилган, иккинчи ва ундан юқори босқичларда таҳсил олаётган талабгорларга нисбатан қўлланилади”;

в) 3-бандда:

биринчи хатбоши куйидаги тахрирда баён қилинсин:

“3. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари 2022/2023 ўқув йилидан бошлаб ҳар йили ўзларининг ҳудудларидан ўқишга кирган 40 нафардан, иккинчи ва ундан юқори босқичларда таҳсил олаётган 110 нафар, жами 150 нафар хотин-қизлар учун маҳаллий бюджетнинг қўшимча манбалари ҳисобидан базавий тўлов-контракт суммасини тўрт ўқув йилининг якунланишига қадар тўлаб беради”;

иккинчи хатбоши чиқариб ташлансин;

учинчи хатбоши иккинчи хатбоши деб ҳисоблансин;

г) 5-бандда:

биринчи хатбошидан “ҳамда давлат олий таълим муассасалари” сўзлари чиқариб ташлансин;

“а” ва “б”-кичик бандлар куйидаги тахрирда баён қилинсин:

“а) кам таъминланган оилалардаги хотин-қизлар. Бунда кам таъминланган оила деганда “Ижтимоий ҳимоя ягона реестри” ахборот тизими орқали белгиланган тартибда кам таъминланган деб эътироф этилган оила тушунилади;

б) ижтимоий эҳтиёжманд оила вакиллари, яъни етим ёки ота-онасининг қарамоғидан маҳрум бўлган талаба хотин-қизлар;”;

куйидаги мазмундаги “в”-кичик банд билан тўлдирилсин:

“в) ижтимоий эҳтиёжманд оила вакиллари, яъни боқувчисини йўқотган (турмуш ўртоғи вафот этган), вояга етмаган фарзандларни ёлғиз тарбиялаётган эҳтиёжманд аёллар”;

д) 6-банддаги “ижтимоий ҳолати тўғрисидаги маълумотномани (ҳужжатни)” сўзлари “аризани” сўзи билан алмаштирилсин;

е) 7, 8, 9 ва 10-бандлар куйидаги тахрирда баён қилинсин:

7. Олий таълим муассасаси қабул комиссияси томонидан талабгорларнинг ижтимоий ҳолати тўғрисида маълумотлар (талабгорнинг туғилганлик ҳақидаги гувоҳномаси, ота-онаси ёки уларнинг бири вафот этганлиги тўғрисида ўлим гувоҳномаси, турмуш ўртоғи вафот этганлиги тўғрисида ўлим гувоҳномаси нусхаси ва вояга етмаган фарзандининг туғилганлик ҳақидаги гувоҳномаси) “Электрон ҳукумат” тизими идоралараро интеграциялашув платформаси орқали олинади.

8. Ҳар бир давлат олий таълим муассасаси белгиланган мезонлар асосида талабгорлар рўйхатини таҳлил қилиб, мазкур Низомнинг 5-бандида келтирилган мезонлар асосида талабгорлар рўйхатини 5 календарь иш кунида Олий ва ўрта махсус таълим вазирлигига юборади.

Олий ва ўрта махсус таълим вазирлиги томонидан ҳар йили 5 календарь иш куни ичида талабгорларнинг рўйхати, талаб этилган ҳужжатлар (талабгорнинг туғилганлик ҳақидаги гувоҳномаси нусхаси, ота-онаси ёки уларнинг бири вафот этганлиги тўғрисида ўлим гувоҳномаси нусхаси, ёхуд турмуш ўртоғи вафот этганлиги тўғрисида ўлим гувоҳномаси нусхаси ва вояга етмаган фарзандининг туғилганлик ҳақидаги гувоҳномаси нусхаси) баллар

кетма-кетлигига қатъий риоя этилган ҳолда бакалаврият таълим йўналишлари ва ўқув йили учун тўлов-контракт миқдорлари аниқ кўрсатилган ҳолда ёзма равишда доимий яшаш жойи бўйича Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларига юборилади.

9. Ҳокимликлар томонидан мазкур Низомга 1-иловага мувофиқ таркибда Ижтимоий эҳтиёжманд оила вакиллари, етим ёки ота-онасининг қарамоғидан маҳрум бўлган талаба хотин-қизларнинг олий таълим олишини моддий жиҳатдан қўллаб-қувватлаш комиссияси (кейинги ўринларда – Комиссия) тузилади. Комиссия Олий ва ўрта махсус таълим вазирлиги томонидан тақдим этилган талабгорлар рўйхатини қуйидаги тартибда кўриб чиқади:

Комиссия аъзолари туман (шаҳар)ларга бириктирилади, туман (шаҳар) ҳокимининг ўринбосари – Оила ва хотин-қизлар бўлими бошлиғи ҳамда тегишли маҳалладаги хотин-қизлар фаолларидан иборат таркибда ишчи гуруҳ тузилади.

Ишчи гуруҳ 5 календарь иш кунида талабгорларнинг доимий яшаш жойи бўйича ижтимоий ҳолатини ўрганади, ўрганиш натижаларига кўра Ишчи гуруҳ ҳар бир талабгорлар бўйича далолатнома тузади ва Комиссияга тақдим қилади.

Зарур ҳолларда Ишчи гуруҳлар томонидан мазкур Низомнинг 5-бандида кўрсатилган мезонларни тасдиқловчи маълумотлар ва электрон шаклдаги ҳужжатлар (туғилганлик, никоҳ қайд этилганлик, вафот этганлик ҳақида ва бошқа) “Электрон ҳукумат” тизими идоралараро интеграциялашув платформаси орқали олинади.

Комиссия 5 календарь иш кунида ишчи гуруҳ томонидан тақдим этилган тегишли ҳужжатларни ўрганиб, талабгорларнинг тўплаган баллари, ҳудудлардаги таълим йўналишлари бўйича кадрларга бўлган эҳтиёж ҳамда талабгорларнинг таҳсил олаётган босқичларини инобатга олиб 150 нафар хотин-қизларни саралаб олади ва баённомани расмийлаштиради ҳамда Оила ва хотин-қизлар давлат қўмитасига юборади.

Оила ва хотин-қизлар давлат қўмитаси 10 календарь иш кунида тавсияномаларни тасдиқлайди ва Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларига юборади.

10. Комиссия ҳар ўқув йилида 1 октябрдан кеч бўлмаган муддатда базавий тўлов-контракт суммалари тўлаб берилиши белгиланган (тавсиянома берилган) хотин-қизлар рўйхатини ҳамда шартномани имзолаш бўйича хулосаларни тегишлилиги бўйича давлат олий таълим муассасаларига ёзма равишда киритади ва белгиланган тартибда шартномаларни расмийлаштиради.

Бунда Комиссия аъзолари томонидан талабгорлардан 150 нафарини танлаб олишда биринчи навбатда уларнинг ижтимоий ҳолати, эҳтиёжмандлиги, тўплаган баллари, ҳудудлардаги таълим йўналишлари бўйича кадрларга бўлган эҳтиёж ҳамда таҳсил олаётган босқичлари инобатга олинади”;

ж) 11-банд ўз кучини йўқотган деб ҳисоблансин;

з) 13-банддан “ҳамда давлат олий таълим муассасалари” сўзлари чиқариб ташлансин;

и) Низомга 1-илова (Ота-онаси ёки уларнинг биридан айрилган мухтож қизлар, боқувчиси йўқ ёлғиз аёллар олий таълим олишини моддий жиҳатдан қўллаб-қувватлаш комиссиясининг намунавий таркиби) да:

номи қуйидаги таҳрирда баён қилинсин:

“Ижтимоий эҳтиёжманд оила вакиллари, етим ёки ота-онасининг қарамоғидан маҳрум бўлган талаба хотин-қизларнинг олий таълим олишини моддий жиҳатдан қўллаб-қувватлаш юзасидан тавсиянома бериш комиссиясининг НАМУНАВИЙ ТАРКИБИ”;

3-банд қуйидаги таҳрирда баён қилинсин:

“3. Қорақалпоғистон Республикаси Вазирлар Кенгаши Раисининг, вилоятлар ва Тошкент шаҳар ҳокимининг ўринбосари – Оила ва хотин-қизлар бошқармаси бошлиғи”;

9-банд қуйидаги таҳрирда баён қилинсин:

“9. Қорақалпоғистон Республикаси Вазирлар Кенгаши Раиси ўринбосари – Оила ва хотин-қизлар кўмитаси раиси, вилоятлар ва Тошкент шаҳар ҳокимлари ўринбосарлари – оила ва хотин-қизлар бошқармалари бошлиқлари ўринбосари, Комиссия котиби”;

к) Низомга 2-илова (Ота-онаси ёки уларнинг биридан айрилган мухтож қизлар, боқувчиси йўқ ёлғиз аёллар олий таълим олишини моддий жиҳатдан қўллаб-қувватлаш тартиби схемаси)нинг матни қуйидаги таҳрирда баён қилинсин:

“Ижтимоий эҳтиёжманд оила вакиллари, етим ёки ота-онасининг қарамоғидан маҳрум бўлган талаба хотин-қизларнинг олий таълим олишини моддий жиҳатдан қўллаб-қувватлаш тартиби СХЕМАСИ

Босқичлар	Амалга ошириш механизми	Субъектлар	Бажариш муддатлари
1-босқич	Олий таълим муассасаларининг бакалавриатига ўқишга қабул қилиш бўйича ўтказилган кириш имтиҳонлари (тест синови, касбий (ижодий) имтиҳон) якуни бўйича танлов натижаларини эълон қилиш.	–Ўзбекистон Республикаси таълим муассасаларига ўқишга қабул қилиш бўйича давлат комиссияси, Давлат тест маркази	Тест синовлари тўлиқ яқунлангандан кейин бир ҳафта ичида

2-босқич	Белгиланган мезонларга мос келувчи хотин-қизлар томонидан олий таълим муассасалари қабул комиссиясига моддий қўллаб-қувватлаш юзасидан мурожаат қилиш.	Талабгорлар	Тест натижалари эълон қилинган кундан бошлаб 10 календарь кун давомида
3-босқич	Базавий тўлов-контракт асосида қабул қилинган ва иккинчи ва ундан юқори босқичларда таҳсил олаётган, белгиланган мезонларга мос талабгорлар рўйхатини шакллантириш.	Давлат олий таълим муассасалари	Тест натижалари эълон қилинган кундан бошлаб 5 календарь кун давомида
4-босқич	Талабгорлар рўйхатини Олий ва ўрта махсус таълим вазирлигига юбориш.	Давлат олий таълим муассасалари	Тест натижалари эълон қилинган кундан бошлаб 5 календарь кун давомида
5-босқич	Талабгорларнинг рўйхатини доимий яшаш жойи бўйича Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларига юбориш.	Олий ва ўрта махсус таълим вазирлиги	5 календарь иш куни ичида
6-босқич	Комиссия аъзоларини туман (шаҳар)ларга бириктириш. Туман (шаҳар)ларга бириктирилган Комиссия аъзоси, туман (шаҳар) ҳокимининг ўринбосари – Оила ва хотин-қизлар бўлими бошлиғи ҳамда тегишли маҳалладаги хотин-қизлар фаолларидан иборат таркибда ишчи гуруҳни тузиш.	Комиссия	Олий ва ўрта махсус таълим вазирлигидан рўйхат юборилган куни

7-босқич	Талабгорларнинг доимий яшаш жойи бўйича ижтимоий ҳолатини ўрганиш. Ҳар бир талабгор бўйича далолатнома тузиш ва Комиссияга тақдим қилиш.	Ишчи гуруҳ	5 календарь иш кунда
8-босқич	Ишчи гуруҳ томонидан тақдим этилган тегишли ҳужжатларни ўрганиб, 150 нафар хотин-қизларни саралаб олиш ва баённомани расмийлаштириш ҳамда Оила ва хотин-қизлар давлат қўмитасига юбориш.	Комиссия	5 календарь иш кунда
9-босқич	Тавсияномаларни тасдиқлаш ва Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларига юбориш.	Оила ва хотин-қизлар давлат қўмитаси	10 календарь иш кунда
10-босқич	Базавий тўлов-контракт суммалари тўлаб берилиши белгиланган (тавсиянома берилган) хотин-қизлар рўйхатини ҳамда шартномани имзолаш бўйича хулосаларни тегишлилиги бўйича давлат олий таълим муассасаларига ёзма равишда киритиш ва белгиланган тартибда шартномаларни расмийлаштириш.	Комиссия	Ҳар бир ўқув йилида 1 октябрдан кеч бўлмаган муддатда

к) қуйидаги мазмундаги 3-илова билан тўлдирилсин:

“Ижтимоий эҳтиёжманд оила вакиллари, етим ёки ота-онасининг қарамоғидан маҳрум бўлган талаба хотин-қизларнинг олий таълим олишини моддий жиҳатдан қўллаб-қувватлаш тартиби тўғрисидаги низомга
3-илова

**Ижтимоий эҳтиёжманд оила вакиллари, етим ёки ота-онасининг қарамоғидан маҳрум бўлган талаба хотин-қизларнинг олий таълим олишини моддий жиҳатдан қўллаб-қувватлаш учун
ТАВСИЯНОМА**

<p>ТАВСИЯНОМА № АА 0000 Ушбу тавсиянома фуқаро _____ га (фамилияси, исми, отасининг исми) (_____) (паспорт серияси ва рақами) Ўзбекистон Республикаси Оила ва хотин-қизлар давлат қўмитаси раисининг 20__ йил “__” _____ даги _____-сон буйруғига асосан берилди. М.Ў. _____ (мансабдор шахснинг Ф.И.О., имзо) 20__ йил “__” _____</p>	<p>ТАВСИЯНОМА № АА 0000 Ушбу тавсиянома фуқаро _____ га (фамилияси, исми, отасининг исми) (_____) (паспорт серияси ва рақами) Ўзбекистон Республикаси Вазиrлар Маҳкамасининг 20__ йил “__” _____ даги _____-сон қарорига мувофиқ ижтимоий эҳтиёжманд оила вакиллари, етим ёки ота-онасининг қарамоғидан маҳрум бўлган талаба хотин-қизларнинг олий таълим олишини моддий жиҳатдан қўллаб-қувватлаш учун берилди. Тавсиянома Ўзбекистон Республикаси Оила ва хотин-қизлар давлат қўмитаси раисининг 20__ йил “__” _____ даги _____-сон буйруғига асосан берилди. Тавсиянома расмийлаштириб берилган санадан эътиборан бир йил муддат давомида кучга эга бўлади. Ўзбекистон Республикаси Оила ва хотин-қизлар давлат қўмитаси _____ (Ф.И.О.) (М.Ў., имзо) 20__ йил “__” _____</p>
--	---

